

# Gore predgrađa Damaska

29 Jan 2012 Izmijenjeno 10:10 CET

## Najviše žrtava u topničkoj i raketnoj paljbi koju je otvorila Assadova vojska



Televizijski snimak tenkova Assadove vojske na ulicama Homsa [EPA Arhiv]

Snage sirijskog predsjednika Bashara al-Assada ubile su najmanje 12 ljudi i više od 30 u bombardiranju predgrađa Damaska koja su u subotu zauzeli pobunjenici, javlja u nedjelju agencija Reuters pozivajući se na sirijske aktiviste. Najmanje polovina žrtava su civili, a ostali dezerteri iz vojske okupljeni pod nazivom Slobodna sirijska vojska, rekli su aktivisti za ljudska prava. Najviše žrtava bilo je u topničkoj i raketnoj paljbi koju je Assadova vojska otvorila na predgrađa Sakba, Hamurija i Kfar Batna u istočnom dijelu Damaska, poznatom kao al-Guta, javlja Reuters iz istih izvora.

### **Oko 2000 vojnika u autobusima, oklopnim vozilima i u pedesetak tenkova krenulo je u zoru prema istočnom predgrađu Damaska Guti.**

"Povrijeđeni su smješteni u poljske bolnice, ali ovdje već danima nema struje. Samo nekoliko ljudi uspjelo je pobjeći, jer je vojska izolirala ovaj dio grada od ostatka Damska i blokirala prolaz do glavne prometnice na sjeveru", rekao je Kemal, jedan od sirijskih aktivista, za britansku agenciju. Sirijske vojne snage u nedjelju su pojačale svoje djelovanje na predgrađa glavnoga grada Damaska koja su pala pod kontrolu pobunjenika i u napadu ubile najmanje pet civila, izvijestili su aktivisti. Oko 2000 vojnika u autobusima, oklopnim vozilima i u pedesetak tenkova krenulo je u zoru prema istočnom predgrađu Damaska Guti, kako bi poduprli trupe koje su ranije opkolile predgrađa Sakbu, Hamuriju i Kfar Batnu.

### **U svim dijelovima zemlje**

Agencije prenose da se sukobi ne smiruju ni u drugim dijelovima zemlje. U pobunjeničkom gradu blizu libanonske granice Rankusu u posljednjih je nekoliko dana u vojnim napadima ubijeno najmanje 33 ljudi, izvijestili su aktivisti i stanovnici obližnjih gradova u nedjelju.

Rankus, planinski grad u kojemu živi oko 25.000 stanovnika, 30 km sjeverno od Damaska, vojne snage bombardiraju od srijede. U srijedu je grad opkolilo nekoliko hiljada vojnika koje predvodi elitna Četvrta divizija, pod zapovjedništvom brata predsjednika Bashara al-Assada Mahera. Stanovnik obližnjeg grada Sednaje, koji je želio ostati anonimn, za Reuters je rekao kako su od srijede ubijene 33 osobe, no pretpostavlja da ima još žrtava, jer još nisu poznate informacije o smrtno stradalima u nedjelju. Ista je osoba kazala kako su očevici rekli da je u borbama srušeno najmanje 10 zgrada, a na ulasku u grad Rankus podignut je vojni kamp.

Izvor: Al Jazeera